

DISCOVER
— ITS BEAUTY —

Karolo ea Boraro 3

LI ABC TSA
ISLAMMO

Dr. Naji Ibrahim



Li Abc Tsa Islamo

Islamo e ruta hore tsela e isang bophelong bo thabileng, bo khotsofatsang, ke ka ho lumela ho Allah Molimo A le Mong oa 'nete le moporofeta oa Hae oa ho qetela Muhammad.

Islamo e boetse e re bolella hore ho lumela ho Molimo le Baporofeta le Baromuoa ba Hae ha hoa lekana ho fumana Khotsofalo ea kelello, thabo, le poloko.

Hape re tlameha ho phetha thato ea Allah, ka ho khumamela Eena FEELA, ho mamela Melao ea Hae, le ho etsa mesebetsi e metle.

Ho feta moo, Allah O re tsebisa ka ho Qur'an ka ts'oarelo, moputso, le Parateisi eo A e lokiselitseng ba lumelang le ho etsa mesebetsi e metle:

- ***Empa ba lumelang ba bile ba etsa liketso tse lokileng -bao ke majalefa a Parateisi; batla hlola teng ka ho sa feleng. (2:82)***
- ***Allah O ts'episitse ba lumelang le ba etsang liketso tse lokileng hore ho bona ho na le ts'oarelo le moputso o moholo. (5:9)***
- ***Ruri, ba lumetseng ba bile ba etsa liketso tse lokileng, batla ba le Lirapa tsa Parateisi e le sebaka sa bolulo. (18:107)***



Moelelo Oa Islamo

Islam o bolela ho inehela thatong ea Allah Molimo A le mong oa 'nete. Ka hona, ho lumela Bonngoe ba Allah (**Tawheed**), ho khumamela Eena feela, ho mamela melao ea Hae, le ho ikokobeletsa thato ea Hae ke moko-taba oa molaetsa oa Allah o rometsoeng ho Baporofeta le Barumuoa bohle ba Hae. Lentsoe lena 'BOINEHELO' ke moelelo oa lentsoe la Searabia '**ISLAM**'.

Kaha Baporofeta le Barumuoa ba Allah (Molimo) Kaofela ba ne ba bolela molaetsa o ts'oanang; ka hona, bolumeli ba bona bo tlameha ho ts'oana! Qur'an e tiisa hore '**Islam**' (ho inehela ho Allah) ke bolumeli ba 'nete ba Adama le Eva le Litloholo tsa bona ho fihlela Letsatsi la Kahlolo. Qur'an e re:

- **Ruri, tumelo mahlong a Allah ke Islamo (ho inehela ho Molimo).** (3:19)
- **Ere: "Ka 'nete, tataiso ea Allah ke tataiso ea 'nete, 'me re laetsoe ho ikokobeletsa Mong'a mafats'e"** (6:71)
- **Joale na ke e fe tumelo eo ba e lakatsang ntle ho ea Allah (Islam, boinehelo ho Molimo)? Ha bohle ba maholimong le lefats'eng ba ikokobelitse tlasa Hae, ba rata kapa ba sa rate, 'me bohle ba tla khutlisetsoa ho Eena.** (3:83)



Moelelo Oa Islamo (tsoelopele)

- ***E reng, [Lona balumeli]: “Re lumetse ho Allah le se senotsoeng ho rona le se senoletsoeng Abrahamama le Ishmaele le Isaaka le Jakobo le Leloko, le se ileng sa fuoa Moshe le Jeso, le se ileng sa fuoa Baporofeta ho tsoa ho Mong’a bona. Ha re khetholle mang kapa mang ho bona, empa re Mamosleme [ka boinehelo] ho Eena. (2:136)***

Ho khahlisang ke hore moelelo oa Islamo o boetse oa late-loa ka Bibeleng o reng:

- ***Ka baka leo, u etse setsoalle le Molimo, ‘me u tla bona Khotso; ka mokhoa o joalo, leseho le tla tla ho uena. (Jobo 22:21)***
- ***Ka baka leo, ipheng ka tlase ho Molimo... (Jakobo 4:7)***

O tsoanang le lithuto tsa Islamo tse re bolellang hore tumelo ho Molimo, ntle le ho etsa liketso tse molemo le mesebetsi e lokileng ha ea lekana ho re nolofalletsa ho fumana pholoho le bophelo bo sa feleng (parateisi), Bibeले ea tlaleha:

- ***Ke ‘na, Molimo, Ke lekolang pelo, Ke lelang matheka, ke tle ke busetse e mong le e mong ka mokhoa oa hae, le ka tholoana ea liketso tsa hae”. (Jeremia 17:10)***
- ***Ke moo le bonang hobane motho o behoa ea lokileng ke mesebetsi ea hae, eseng ke tumelo e ‘nots’i... Hobane, joalo ka ha ‘mele o se nang moea o shoele, le eona tumelo, ha e se na mesebetsi e shoele. (Jakobo 2:24-26)***




Mamosleme A sebetsang

Ruri, Mamosleme ha a lumele ho Allah feela (Molimo a le mong oa 'nete), a boetse a etsa liketso tse ntle. Ba mamele litaelo le lithuto tsa Jeso, Muhammad, le Baporofeta bohle le ho ikobela tsona, tse kang ho lumela ho Molimo a le Mong oa 'nete, ho rapela, ho oa ka mangole ka khumamelo, ho ila (ho itima lijo le tse ling), ho fana ka limpho le linyehelo, ba re: "Haeba Molimo a rata (***Insha Allah***)" bakeng sa ho hong (ho tlang ho etsahala) nakong e tlang, le ho sebelisa tumeliso ea Jeso le Baporofeta, "Khotso e be le Iona (***Assalaam Alaikum***)".

Ena ke mehlala e seng mekae feela le likotoana tsa bopaki tse bonts'ang ka ho hlaka bonnete, bonngoe, le bokahohle ba bolumeli bona bo hlolang bo botle ba Baporofeta bohle ba Allah: '***Islamo***' (***boinehelo ho Allah***).

Ha e le hantle, Lemosleme, kapa motho ea ka ratang ho amohela Islamo, o tlameha ho lumela lihloohong le methoong ea tumelo ho Islam.



TUMELO HO ALLAH
MOLIMO A LE MONG OA 'NETE

الله




Lihlooho Tse Ts'eletseng Tsa Tumelo Ho Islam

1. Tumelo ho Allah (Molimo)- boteng ba Hae, Bonngoe ba Hae (ka Searabia, Tawheed), Borena ba Hae, mabitso a Hae a ikhethileng le lits'oaneleho tsa Hae, le hore ke Eena feela ea lokeloang ke khumamelolo.

Qur'an e khanyang le Moporofeta Muhammad li re rutila ka mabitso le lits'oaneleho tsa Allah, Molimo O le mong oa 'nete. Re keke ra utloisisa boholo ba Allah, empa ha re tseba haholoanyane ka Eena, re ka mo rata le ho mo rapela ha molemo.

Tse latelang ke tse ling tsa lits'oaneleho le mabitso a Hae: Allah (lebitso le nepahetseng la Molimo). Morena, Molimo O le Mong oa 'nete, Ea Lereko, Ea Mohau, 'Mopi, 'Musi, Morena, Ea Halalelang, Ea Hloekileng, Ea Bokoang, Mohloli oa Khotso le phetheho, Moahloli, Ea Tsebang Tsohle, Ea Bonang Tsohle, Ea Utloang Tsohle, E Moholo, Ea Ts'oarelang Kahohle, Ea Phahameng ka ho Fetisisa, Ea Ratang ka ho Fetisisa, Ea Mosa ka ho Fetisisa, Mofani, le 'Nete.

Moporofeta Muhammad (*mahlohonolo le Khotso tsa Allah li be le eena*) o itse, "**Lits'obotsi tse feletseng tsa botle le phetheho ke tsa Allah. Ruri, Allah O rata botle**".



Lihlooho Tse Ts'eletseng Tsa Tumelo Ho Islam (tsoelopele)

2. Tumelo ho Mangeloi a Allah, ao A a bopileng ho morisa le ho Mo mamela ka ho phethehatsa litaelo tsa Hae.

3. Tumelo ho Lits'enolo (Libuka) tsa Allah, ho kenyeletsoa le mantsoe a mantlha a Allah, a senoletsoeng Abrahama, Davida, Moshe, le Jeso. Qur'an e Khanyang ke Lentsoe la Molimo la ho qetela, le hloekileng, la 'nete la Molimo, le rometsoeng ho Moporofeta Muhammad.

4. Tumelo ho Baporofeta le Baromuoa ba Allah, ho kenyeletsa Adama, Noe, Moshe, Johanne Mokolobetsi, Jeso, le Muhammad. Ha e le hantle, Lemosleme ha se molumeli oa 'nete haeba a e shoa a sa lumele ho Moshe le Jeso (le ba bang) e le Baporofeta ba rometsoeng ho tsoa ho Allah Molimo A le Mong oa 'nete, 'Mopi.

5. Tumelo ho Letsatsi la ho Qetela, Letsatsi la Kahlolo le Boikarabello. Ka letsatsi leo, batho bohle batla ahloloa ke Allah ho ea ka tumelo ea bona ho Eena le liketso tsa bona.

Ka mor'a kahlolo ena ea Molimo, ba neng ba lumela ho Allah 'me ba etsa liketso tse ntle; batla amohehelo bophelong ba thabo, bo sa feleng parateising. Ka lehlakoreng le leng, ba neng basa lumele ho Allah, ba sa ka ba etsa mesebetsi e metle, ba bile ba tlotse melao ea Allah; batla lahleloa Mollong oa Lihele. (Molimo A re pholose Mollong oa Lihele, 'me A re fe bophelo bo sa feleng Parateising).




Lihlooho Tse Ts'eletseng Tsa Tumelo Ho Islam (tsoelopele)

6. Tumelo ho qetello e reriloeng ke Allah le tsebong ea Hae e phethahetseng ea lintho tsohle.

Kaha balumeli ba ts'epa Allah, ba khotsofetse, 'me ba its'epa ka eng kapa eng eo Allah A ba laetseng eona, ebang ba e bona e le ntle kapa e le mpe. Ba leka hore ba se ke ba nyahama, ba felloa ke ts'epo, kapa ba nyahama ha ho hlaha tlokotsi kapa mathata.

Ho e-na le hoo, ba etsa sohle seo ba ka se khonang ho ntlafatsa boemo ba bona empa qetellong ba retelehela ho Allah bakeng sa thuso; ts'ehetso le moputso.

Tumelo ena e ntle ho Allah le taelo ea Hae e tlisetsa Mamosleme Khotsofalo ho sa tsotellehe litlokotsi le likhatello tse ba hlahelang; kapa tlhekefetso, litlhaselo, mesebetsi, le ho tlatlapuo ka naha, oli, le leruo la bona tse ntseng li etsahala lefats'eng kajeno, hosa tsotellehe ho hloka toka, leeme, khethollo, le ho netoa tseo ba tobaneng le tsona kapa ba hlokofoang ka tsona.





Lits'ia Tse Hlano Tsa Islamo

Islamo e re ruta ho kenya tumelo ts'ebetsong. Le ho phaela ka ho etsa mesebetsi e metle ka kakaretso, Mamosleme le ba ratang ho amohela Islamo; ba tlameha ho tataea ka lits'iea tse hano tsa motheo:

1. *Shahadah* (kano ea tumelo):

Hore: ***“Ke paka hore ha ho molimo ea lokeloang ke khumamelo haese Allah, le hore Muhammad ke Moromuo oa Allah.”***

E baleha tjena ka Searabia:

ASH-HADU ALLAH ILAHA ILLA ALLAH, WA ASH-HADU ANNA MUHAMMADAN RASOOLU ALLAH.

Boiphatlalatso (bopaki) bona bo bonolo ke khoro ea ho kena ho Islamo





Lits'ia Tse Hlano Tsa Islamo (tsoelopele)

2. Salat (Thapelo):

Ho etsa lithapelo tse hlano tsa letsatsi le letsatsi, tse tlamang. Lithapelo tsena tsa moetlo li kenyeletsa ho ema, ho inama le ho oela ka sefahleho; ho pheta likarolo tsa Qur'an; ho rorisa le ho hopola Allah; le ho kopa mohau oa Hae, ts'oarelo le Parateise.

Botle le matla a lithapelo li re tlisetsa kholo ea semoea, boiketlo ba kelello, ts'ehetso, hammoho le phomolo, khutso, le khotsofalo bakeng sa meea, likelello le lipelo tsa rona. Tsela eo lithapelo li beuoeng ka eona ho pharalla le bosiu le mots'eare ho bolela hore re lula re hopotsoa ka Allah (Molimo).

Se tlatsetsang botleng ba thapelo ke 'nete ea hore Bapropeta ba Molimo ba kenyelletsang Adama, Noe, Abraham, Moshe, Jeso le Muhammad le bona ba ne ba rapela 'me ba oa ka lifahleho ho Molimo O le mong oa 'nete, Allah. Ka mantsoe a mang, Mamosleme a latela mehlaleng ea Bapropeta le Barumuoa bao ba Molimo.

Ho feta moo, likhopolo tse ling tse ngata tse ntle, tse kang ho rata Molimo, ho ikokobetsa le ho inehela ho Eena, thapeli, bonngoe, botšepahi, mamello, boikokobetso le bonolo li bonahala le ho ithutoa ka thapelo.

Ruri, thapelo e tiileng, dhikr (khopolo ea Allah), istighfar (ho kopa ts'oarelo), le du'a (thapeli) ho Allah feela, ke linotlolo tse tebileng le tse babatsehang tsa khotsofalo ea kelello, khutso le mahlohonolo.




Lits'ia Tse Hlano Tsa Islamo (tsoelopele)

3. Zakat (Ho fana/Linyehelo):

Ke setlamo ho fana ka tekanyo e itseng ea leruo la motho ho mafutsana le bahloki. Zakat e hloekisa, thepa le chelete, ha ka nako e ts'oanang e re hloekisa meharo le bobbe.

Zakat kapa ho fana ho ruta ho tsotella le ho arolelana, eleng lits'ia tse ahang marokho a matla a lerato le tlhompheho pakeng tsa barui le mafutsana. Ruri, e khothalletsa ts'ehetso, thuso, ts'ebeliso 'moho le bongoe sechabeng ka kakaretso.






Lits'ia Tse Hlano Tsa Islamo (tsoelopele)

4. *Swam* (ho ila):

Swam e bolela ho itima lijo tsohle le lino, le likamano tsa lenyalo, ho tloha ka meso ho fihlela ha letsatsi le likela kholing eohle ea Islamo ea Ramadan. Tse ling tsa melemo le lithuto tse ntle tsa ho itima lijo li kenyelletsa:

- **Melemo ea Semoea:** Re holisa taqwa (letsoalo) le bots'epehi. Khoeli ea ho itima lijo ea Ramadan e fana ka monyetla o babatsehang oa ho fumana mohau le ts'oarelo ea Molimo, ho pholoso molong oa Lihele, le ho fumana bophelo bo sa feleng Parateiseng.
- **Melemo ea boitšoaro le maikutlo:** Sekolong sa Ramadan, re amohela le ho utloa tlala eo batho ba limilione likarolong tse fapaneng tsa lefats'e ba e utloang ntle le boikhetlo. Sena se re susumelletsa ho arolelana, ho utloela bohloko, le ho ikokobetsa, ho fana le ho ba mosa.
- **Melemo ea thuto:** Ho ila ho re fa lithuto tse ngata; mohlala, rea bona hore hoa khoneha ho fetola kapa ho tlohela mekhoha e mebe e kang ho ja ho feta tekanyo. Ho itima ho laea boits'oaro ba rona 'me ho re koetlisetsa ho ba le mamello le ho ithiba. Hape, e re hopotsa hore Baprofeta ba Molimo, ba kang Muhammad, Moshe, le Jesu, le bona ba ne ba itima.
- **Melemo ea bophelo bo botle:** Ka mokhoa oa ho ila, 'mele o nts'a chefo le mafura a eketsehileng. Hangata lingaka le litsebi tsa phepo e nepahetseng li khothalletsa ho itima, ba e hlalosa e le 'secheso sa lithole (tsa 'mele)' le 'phekolo; 'me e lumeloa e le pheko ea mafu a mangata.



Lits'ia Tse Hlano Tsa Islamo (tsoelopele)

5.Hajj (Leeto la Selumeli):

Hajj ke leeto la ho ea Makkah leo Lemosleme le leng le le leng le lokelang ho le phetha hang bophelong ba hae, ha feela a khona ho etsa joalo 'meleng, kelellong le boemo ba lichelete bo lumela.

Joalo ka lits'iea le mekhoa e meng ea Islamo, botle, lithuto le melemo ea Hajj e mengata. Limilione tsa balumeli ba mebala eohle le merabe eohle, ho tsoa lefats'eng lohle, ba arabela pitso ea Moprofeta Abrahamama, eo (le mosali oa hae Agare le mora oa hae Ishmaele) ba amanang le lits'ebeletso tse ngata tsa Hajj. Mekhoa le likhopolo tse tsotelang li ka bonoa li etsahala nakong ea Hajj, ho kenyeletsa: ho ikokobeletsa le ho mamela Allah, boena bo bonahalang ho Islamo, bonngoe, mamello, mahlabele, lithapelo, ho fana le ho ila. Hajj e bang selemo le selemo, ke engoe ea likopano tse kholo ka ho fetisisa le tse ikhethang tsa bolumeli tsa mofuta oa eona lefatšeng.

Nakong ea kopano ena e tsotelang ea merabe eohle le mebala eohle, bohle ba sebeletsa Molimo a le mong feela 'me ba latela molaetsa o le mong feela, Malcom X le ba bang ba sibollotse botle ba tumelo ea 'nete, boena bo bonahalang ho Islamo ba bonngoe le tekano.

Malcom X o tlalehile: **“Leeto la ka la selumeli(hajj) le ile la atolosa monahano oa ka. Le ile la ntlhohonolofatsa ka temoso e ncha. Ka libeke tse peli Naheng e Halalelang, ke ile ka bona seo ke neng ke e-s’o ka ke se bona lilemong tse mashome a mararo a metso e robong mona Amerika. Ke bone merabe eohle, mebala eohle. Ho tloha ho bo-mahlo maputsoa ho isa ho Mafrika a letlalo le lets’o ka boena ba sebele! Ka bonngoe! Ho phela ha ‘moho! Ho khumamela ha ‘moho!”** (Pale ea Bophelo ea Malcom X) .

Lithaloso tsa Mabitso a Maholo ho Islam

Allah: Ka Searabo, Allah ke Lebitso le nepahetseng la Molimo O Mong oa 'nete, 'Mopi. Islamo e ruta hore Allah ke Molimo oa 'nete oa moloko oohle oa batho. Maarabo a Bajuda le ba Bakeresete a sebelisa lebitso lena Allah ha a bua ka Molimo 'me ke lentsoe le sebelisoang bakeng sa Molimo Libibeleng tsa puo ea Searabo.

Muhammad: (Mahlohonolo le Khotso tsa Allah li be le eena): Moprofeta oa ho qetela oa Molimo O mong oa 'nete, Allah 'Mopi, ea rometsoeng ho batho bohle.

Qur'an e Khanyang: Lentsoe la ho qetela la Allah, Molimo O le Mong oa 'nete, joalokaha le senoletsoe Moprofeta Muhammad.

Islam: Ho inehela tlas'a Thato ea Allah, Molimo O mong oa 'nete.

Lemosleme: Ea inehela tlas'a Thato ea Allah, Molimo O mong oa 'nete ebile a khumamela Eena feela.

Mosque (Masjid): Sebaka se hloekileng sa ho oa ka sefahleho, se sebelisoang ke Mamosleme haholo bakeng sa thapelo le khumamelo.



Allah ka Searabo



Lemosleme le etsang thapeli ho Allah (Molimo oa 'nete)



Qur'an e khanyang



Mohammad ka Searabo

Kano ea Tumelo

(khorho ea ho kena ho Islamo)

“Ke paka hore ha ho molimo ea lokeloang ke khumamelo haese Allah, ‘me ke paka hore Muhammad ke Moromuoa oa Allah.”

Ka Searabo e utloahala tjena:



ASH-HADU ALLA ILAHA ILLA ALLAH, WA ASH-HADU ANNA MUHAMMADAN RASOOLU ALLAH.



Hona ke polelo ea bopaki ba tumelo boo motho a lokelang ho bo etsa e le hore a amohele Islamo; e akaretsa ‘nete, botle le bonolo ba Islamo.

Na U labalabela ho tseba?

Haeba u labalabela ho tseba ‘me U thahasella ho fumana lintlha tse ling mabapi le Islamo, ka Kopo etela marang-rang a rona:

www.discoveritsbeauty.com

DISCOVER
— ITS BEAUTY —

WWW.DISCOVERITSBEAUTY.COM



Scan it!

GLOBAL ACADEMY FOR TRANSLATION AND EDUCATION (GATE)
LONDON | THE UNITED KINGDOM

كتاب أبجديات الإسلام بلغة ليسوتو